

რეგისტრატორის ხელშეკრულება

1. ხელშეკრულების მხარეები

- 1.1 შპს „კავკასუს ონლაინ“ საქართველოს კანონმდებლობის შესაბამისად დაფუძნებული და მოქმედი კომპანია საიდენტიფიკაციო ნომრით: 211380833, იურიდიული მისამართი: საქართველო, ქ. თბილისი, ძველი თბილისის რაიონი, წინამძღვრიშვილის ქ. #160 (შემდგომში „ადმინისტრატორი“ ან „კავკასუს ონლაინ“);
- 1.2 [იურიდიული პირის სახელი], [საიდენტიფიკაციო ნომერი], [იურიდიული მისამართი] (შემდგომში „რეგისტრატორი“).

რეგისტრატორი და ადმინისტრატორი ერთობლივად მოხსენებული, როგორც „მხარეები“, ხოლო ცალ-ცალკე, როგორც „მხარე“.

2. პრეამბულა

- ვინაიდან,* ადმინისტრატორი უზრუნველყოფს საქართველოში .GE ქვეყნის კოდის ზედა დონის დომენის ადმინისტრირებას, დომენური სახელების რეგისტრის წარმოებას .GE დომენის რეგისტრაციისა და ადმინისტრაციის წესებსა („დომენის რეგულაცია“ ან „რეგულაცია“) და სხვა სამართლებრივ საფუძვლებზე დაყრდნობით;
- ვინაიდან,* ადმინისტრატორმა დაადასტურა რეგისტრატორის მიერ დომენის რეგულაციის შესაბამისად წარდგენილი განაცხადი და ხელშეკრულების ძალაში შესვლის თარიღიდან რეგისტრატორს აქვს უფლება და ვალდებულება გაუწიოს სარეგისტრაციო მომსახურება რეგისტრანტებს და მიიღოს ანაზღაურება რეგისტრანტებისგან ასეთი მომსახურების გაწევისთვის;
- ვინაიდან,* რეგისტრატორის გააჩნია საკმარისი კვალიფიკაცია, რომ დააკმაყოფილოს დომენის რეგულაციის და წინამდებარე ხელშეკრულების პირობები;
- ვინაიდან,* მხარეთა სურვილია უზრუნველყონ რეგისტრანტების მიერ დომენური სახელის რეგისტრაციის, გამოყენების უსაფრთხოება და ხარისხი.

შესაბამისად, მხარეები თანხმდებიან შემდეგზე:

3. ტერმინთა განმარტება

- 3.1 წინამდებარე ხელშეკრულებაში გამოყენებულ ტერმინებს აქვთ ამ ხელშეკრულებაში და დომენის რეგულაციაში მინიჭებული მნიშვნელობა.
- 3.2 შემდეგ ტერმინებს, თუ სხვაგვარად არ მოითხოვს კონტექსტი, აქვთ შემდეგი მნიშვნელობა:

- 3.2.1 „ხელშეკრულება“- ნიშნავს წინამდებარე „რეგისტრატორის ხელშეკრულებას“ მისი ყველა დანართით;
- 3.2.2 „ძალაში შესვლის თარიღი“- აქვს ხელშეკრულების 19.1 მუხლით განსაზღვრული მნიშვნელობა;
- 3.2.3 „ტექნიკური პირობები“- ნიშნავს ადმინისტრატორის მიერ დადგენილ ტექნიკურ პირობებს, როგორც ეს მოცემულია N2 დანართში. ადმინისტრატორი უფლებამოსილია ცალმხრივად შეცვალოს N2 დანართში მოცემული პირობები, რის შესახებაც უნდა აცნობოს რეგისტრატორს ასეთი ცვლილების ძალაში შესვლამდე სულ მცირე 1 (ერთი) კალენდარული თვით ადრე რეგისტრატორის ელექტრონულ ფოსტაზე შეტყობინების გაგზავნით.
- 3.2.4 „კომპეტენციის მოთხოვნები“- ნიშნავს წინამდებარე ხელშეკრულების 5.1 მუხლით დადგენილ მოთხოვნებს, რომლებსაც უნდა აკმაყოფილებდეს რეგისტრატორი.
- 3.3 მითითება საკანონმდებლო აქტზე ან საკანონმდებლო აქტის დებულებაზე ნიშნავს მითითებას ამ საკანონმდებლო აქტზე მისი ნებისმიერი ცვლილებების, დამატების ან განახლების გათვალისწინებით და მოიცავს მის საფუძველზე მიღებულ ნებისმიერ კანონქვემდებარე აქტს.
- 3.4 მუხლების სათაურები გამოყენებულია მხოლოდ მოხერხებულობისთვის და მათ გავლენა არ აქვთ ხელშეკრულების განმარტებაზე.
- 3.5 ნებისმიერი მითითება „პირზე“ მოიცავს ნებისმიერ იურიდიულ ან ფიზიკურ პირს, სახელმწიფოს ან სახელმწიფო დაწესებულებას ან ნებისმიერ ასოციაციას, ფონდს ან ამხანაგობას (მიუხედავად იმისა არიან თუ არა ისინი დამოუკიდებელი სამართალ სუბიექტები) ან აღნიშნულთაგან ორს ან მეტს; აგრეთვე, მითითება ნებისმიერ „პირზე“ მოიცავს მის სამართალმემკვიდრეებს, ნებადართულ უფლებამონაცვლეებსა და უფლებების გადამცემ პირებს.

4. ზოგადი დებულებები

4.1 ხელშეკრულების საგანი

- 4.1.1 წინამდებარე ხელშეკრულებაზე ხელმოწერით რეგისტრატორი იღებს ავტორიზაციას, უფლებას და ვალდებულებას გაუწიოს სარეგისტრაციო მომსახურება რეგისტრანტებს წინამდებარე ხელშეკრულების და დომენის რეგულაციის შესაბამისად.

4.2 ექსკლუზიურობის არარსებობა

- 4.2.1 წინამდებარე ხელშეკრულების საფუძველზე რეგისტრატორისთვის მინიჭებული უფლებამოსილებები არ არის ექსკლუზიური და ხელშეკრულებაზე ხელმოწერა არ უკრძალავს ადმინისტრატორს, რომ გააფორმოს ხელშეკრულებები სხვა რეგისტრატორებთან.

5. კომპეტენციის მოთხოვნები

- 5.1 რეგისტრატორი ხელშეკრულების მოქმედების ვადის განმავლობაში უნდა აკმაყოფილებდეს ქვემოთ ჩამოთვლილ კომპეტენციის მოთხოვნებს:
 - 5.1.1 რეგისტრატორს უნდა გააჩნდეს საჭირო ტექნიკური და ორგანიზაციული რესურსი, რომ შეასრულოს ხელშეკრულებით და დომენის რეგულაციით გათვალისწინებული ვალდებულებები და გასწიოს სარეგისტრაციო მომსახურება;
 - 5.1.2 რეგისტრატორი უნდა აკმაყოფილებს წინამდებარე ხელშეკრულების N1 დანართში მითითებულ პირობებს;
 - 5.1.3 რეგისტრანტებისთვის სარეგისტრაციო მომსახურების გაწევის მიზნებისთვის, რეგისტრატორს უნდა შეეძლოს უზრუნველყოს ელექტრონული ფოსტის ფუნქციონირება, ასეთი ელექტრონული ფოსტის მისამართი უნდა იყოს გამოქვეყნებული რეგისტრატორის ვებ-გვერდზე;
 - 5.1.4 რეგისტრატორს მისი საქმიანობის განხორციელების პროცესში უნდა ჰქონდეს დადგენილი შიდა რეგულაციები, რომელი რეგულაციებიც აწესრიგებს რეგისტრატორის თანამშრომლების მიერ პერსონალურ მონაცემთა დამუშავებას, მათ შორის, ინფორმაციის ხელმისაწვდომობას და ერთიანობას, არასაჭირო ასლების გაკეთების შეზღუდვას და რეგისტრატორმა უნდა უზრუნველყოს აღნიშნული შიდა რეგულაციების შესრულების კონტროლი.
- 5.2 ადმინისტრატორი უფლებამოსილია აკონტროლოს რეგისტრატორის მიერ კომპეტენციის მოთხოვნების შესრულება ხელშეკრულების ვადის განმავლობაში, მათ შორის, სამუშაო დროის განმავლობაში რეგისტრატორის ადგილსამყოფელზე შემოწმებით, რეგისტრატორისთვის გონივრული ვადის ფარგლებში წინასწარი შეტყობინების გაგზავნის საფუძველზე. რეგისტრატორი ვალდებულია, ნება დართოს ადმინისტრატორს, რომ კონტროლის მიზნებისთვის შეამოწმოს საჭირო მონაცემები და ასევე კეთილსინდისიერად ითანამშრომლოს ადმინისტრატორთან.

6. სარეგისტრაციო მომსახურება

- 6.1 რეგისტრატორი ვალდებულია სარეგისტრაციო მომსახურება გაუწიოს რეგისტრანტებს, რომელთაც წარადგინეს სარეგისტრაციო მომსახურების გასაწევად განაცხადი, დომენის რეგულაციის და რეგისტრატორსა და რეგისტრანტს შორის გაფორმებული მომსახურების ხელშეკრულების შესაბამისად.
- 6.2 რეგისტრატორი ვალდებულია სარეგისტრაციო მომსახურების გაწევის შესახებ ხელშეკრულება რეგისტრანტთან დადოს ელექტრონული ფორმით, ქართულ და ინგლისურ ენებზე, რომელთაც ექნებათ თანაბარი იურიდიული ძალა.
- 6.3 რეგისტრანტსა და რეგისტრატორს შორის გასაფორმებელი სარეგისტრაციო მომსახურების გაწევის შესახებ ხელშეკრულება, მათ შორის და არამხოლოდ, უნდა შეიცავდეს შემდეგ მინიმალურ პირობებს:

- 6.3.1 რეგისტრატორის ვალდებულებას ადმინისტრატორის წინაშე, რომ შეასრულებს ძალაში მყოფ დომენის რეგულაციას, შესაბამის ინსტრუქციებს (ასეთის არსებობის შემთხვევაში), რომლებიც გამოქვეყნებულია ადმინისტრატორის ვებ-გვერდზე;
- 6.3.2 რეგისტრანტის თანხმობას, რომ ადმინისტრატორი უფლებამოსილია მოითხოვოს რეგისტრანტისგან ადმინისტრატორის წინაშე მისი ვალდებულებების შესრულება, რომლებიც გაწერილია სარეგისტრაციო მომსახურების გაწევის შესახებ ხელშეკრულებაში და დომენის რეგულაციაში;
- 6.3.3 რეგისტრანტის თანხმობას „.GE დომენურ სახელებთან დაკავშირებული დავების მოგვარების პოლიტიკაზე“ („დავების მოგვარების პოლიტიკა“), მათ შორის, „წესებზე“ და WIPO-ს „დამატებით წესებზე“ (როგორც ეს განმარტებულია დავების მოგვარების პოლიტიკაში), რომელთა ძალაში მყოფი ვერსია ხელმისაწვდომია შემდეგ ვებ-გვერდზე: <https://nic.ge/ka/administrator/the-ge-domain-regulations>; ასევე, WIPO-ს არბიტრაჟისა და მედიაციის ცენტრის კომპეტენციაზე განიხილოს დავები ინგლისურ ენაზე დავების მოგვარების პოლიტიკის შესაბამისად.

7. რეგისტრატორის უფლებები და ვალდებულებები სარეგისტრაციო მომსახურების გაწევისას

- 7.1 რეგისტრატორი ვალდებულია გაუწიოს სარეგისტრაციო მომსახურება რეგისტრანტებს წინამდებარე N2 დანართში მოცემული ტექნიკური პირობების შესაბამისად.
- 7.2 რეგისტრატორი უფლებამოსილია სარეგისტრაციო მომსახურების გაწევის პროცესში შეამოწმოს რეგისტრანტის ან/და მისი წარმომადგენლის ვინაობა დომენის რეგულაციით დადგენილი წესის შესაბამისად.
- 7.3 რეგისტრატორი ვალდებულია გასწიოს სარეგისტრაციო მომსახურება კეთილსინდისიერად წინამდებარე ხელშეკრულების და დომენის რეგულაციის შესაბამისად.
- 7.4 რეგისტრატორი ვალდებულია რეგისტრანტებისთვის სარეგისტრაციო მომსახურების გაწევისას გაითვალისწინოს შემდეგი ფინანსური პირობები:
 - 7.4.1 დომენური სახელის რეგისტრაციის განახლების საფასური მოცემული უნდა იყოს რეგისტრატორსა და რეგისტრანტს შორის გასაფორმებელ სარეგისტრაციო მომსახურების გაწევის შესახებ ხელშეკრულებაში;
 - 7.4.2 2018 წლის 16 აპრილამდე რეგისტრირებული დომენური სახელების რეგისტრაციის განახლების საფასური:
 - (i) .ge დაბოლოების მქონე დომენური სახელის შემთხვევაში არ უნდა აღემატებოდეს 30 (ოცდაათი) ლარს;
 - (ii) ზოგადი დომენური სახელის შემთხვევაში არ უნდა აღემატებოდეს 12 (თორმეტი) ლარს.
 - 7.4.3 რეგისტრატორის მიერ რეგისტრანტისთვის .ge დაბოლოების მქონე დომენური სახელის რეგისტრაციისთვის დაწესებული ყოველწლიური

საფასური არ უნდა იყოს 28 (ოცდარვა) ლარზე ნაკლები, ხოლო **ზოგადი დომენური** სახელის შემთხვევაში - 10 (ათი) ლარზე ნაკლები.

- 7.5 **ადმინისტრატორი** უფლებამოსილია მოითხოვოს **რეგისტრატორისგან** და **რეგისტრატორი** ვალდებულია განახორციელოს გარკვეული ქმედებები მისი კომპეტენციის ფარგლებში, თუ ასეთი აუცილებელია სასამართლოს ან დავის ალტერნატიული განმხილველი ორგანოს, მათ შორის, **WIPO**-ს არბიტრაჟისა და მედიაციის ცენტრის გადაწყვეტილების აღსასრულებლად.
- 7.6 **რეგისტრატორი** ვალდებულია შეატყობინოს **რეგისტრანტს დომენის რეგულაციის** ნებისმიერი სახის ცვლილებების შესახებ ასეთი ცვლილებების ძალაში შესვლამდე სულ მცირე 10 (ათი) სამუშაო დღით ადრე.

8. რეგისტრატორის განცხადებები და გარანტიები

- 8.1 **რეგისტრატორი** აცხადებს და გარანტიას იძლევა, რომ:
- 8.1.1 **რეგისტრატორი** წარმოადგენს სათანადოდ დაფუძნებულ იურიდიულ პირს, რომელიც მოქმედებს საქართველოს კანონმდებლობის შესაბამისად;
- 8.1.2 **რეგისტრატორს** აქვს ყველა შესაბამისი უფლებამოსილება გააფორმოს ეს **ხელშეკრულება** და შეასრულოს ამ **ხელშეკრულებით** ნაკისრი ვალდებულებები;
- 8.1.3 **რეგისტრატორის** მიერ ამ **ხელშეკრულების** ხელმოწერა და შესრულება ა) არ ეწინააღმდეგება **რეგისტრატორის** შიდა ორგანიზაციულ დოკუმენტებს და სხვა სახელმძღვანელო დოკუმენტებს; ბ) არ არღვევს, არ ეწინააღმდეგება ან არ გამოიწვევს **რეგისტრატორის** მხრიდან რაიმე შეთანხმებით გათვალისწინებული ვალდებულების დარღვევას, რომლის მხარე არის **რეგისტრატორი**; გ) არ დაარღვევს მარეგულირებელ კანონმდებლობას;
- 8.1.4 **რეგისტრატორი** აკმაყოფილებს N1 დანართით განსაზღვრულ **რეგისტრატორისთვის** დადგენილ მოთხოვნებს და აქვს შესაძლებლობა და სათანადო კვალიფიკაცია, გაუწიოს **სარეგისტრაციო მომსახურება რეგისტრანტებს** N2 დანართით განსაზღვრული ტექნიკური პირობების შესაბამისად.

9. ადმინისტრატორის განცხადებები და გარანტიები

- 9.1 **ადმინისტრატორი** აცხადებს და გარანტიას იძლევა, რომ:
- 9.1.1 **ადმინისტრატორი** წარმოადგენს საქართველოს კანონმდებლობის შესაბამისად სათანადოდ დაფუძნებულ იურიდიულ პირს და ახორციელებს .GE ქვეყნის კოდის **ზედა დონის დომენის** ადმინისტრირებას საქართველოში;

- 9.1.2 ადმინისტრატორს აქვს ყველა შესაბამისი უფლებამოსილება გააფორმოს ეს ხელშეკრულება და შეასრულოს ამ ხელშეკრულებით და დომენის რეგულაციით ნაკისრი ვალდებულებები;
- 9.1.3 ადმინისტრატორის მიერ ამ ხელშეკრულების ხელმოწერა და შესრულება ა) არ ეწინააღმდეგება ადმინისტრატორის შიდა ორგანიზაციულ დოკუმენტებს და სხვა სახელმძღვანელო დოკუმენტებს; ბ) არ არღვევს, არ ეწინააღმდეგება ან არ გამოიწვევს ადმინისტრატორის მხრიდან რაიმე შეთანხმებით გათვალისწინებული ვალდებულების დარღვევას, რომლის მხარე არის ადმინისტრატორი; გ) არ დაარღვევს მარეგულირებელ კანონმდებლობას.

10. რეგისტრანტის მონაცემები

- 10.1 სარეგისტრაციო განაცხადის წარდგენისას რეგისტრატორი რეგისტრანტისგან ითხოვს ინფორმაციას, როგორც ეს მითითებულია დომენის რეგულაციაში. რეგისტრატორი არ არის უფლებამოსილი დაიწყოს რეგისტრანტისთვის სარეგისტრაციო მომსახურების გაწევა მანამ, სანამ რეგისტრანტი არ წარადგენს საჭირო მოთხოვნილ ინფორმაციას და დოკუმენტებს.
- 10.2 რეგისტრატორი ვალდებულია წარუდგინოს ადმინისტრატორს რეგისტრანტის ელექტრონული განაცხადი წინამდებარე N2 დანართში მითითებული ტექნიკური პირობების შესაბამისად.

11. დომენის რეგულაცია

- 11.1 რეგისტრატორმა უნდა გამოიყენოს და გაითვალისწინოს დომენის რეგულაციის პირობები რეგისტრანტთან გასაფორმებელ სარეგისტრაციო მომსახურების გაწევის შესახებ ხელშეკრულებაში. რეგისტრატორმა უნდა გახადოს დომენის რეგულაცია ხელმისაწვდომი მის ვებ-გვერდზე რეგისტრანტთან გასაფორმებელი ხელშეკრულების სტანდარტული პირობებისგან განცალკევებით.

12. ჩანაწერების შენახვა

- 12.1 წინამდებარე ხელშეკრულების 6.3 მუხლში მითითებული თანხმობები უნდა იყოს რეგისტრატორის მიერ დაფიქსირებული რეგისტრანტთან გასაფორმებელ სარეგისტრაციო მომსახურების გაწევის შესახებ ხელშეკრულებაში. რეგისტრატორმა ადმინისტრატორის მხრიდან მოთხოვნის შემთხვევაში ადმინისტრატორს უნდა წარუდგინოს რეგისტრანტებთან გაფორმებული მომსახურების ხელშეკრულებები. ადმინისტრატორი უფლებამოსილია გააკეთოს ასეთი მომსახურების ხელშეკრულებების ასლები.
- 12.2 რეგისტრატორი ვალდებულია შეინახოს სარეგისტრაციო მომსახურების გაწევასთან დაკავშირებული დოკუმენტები მათ შორის რეგისტრანტის მიერ

გადახდის დამადასტურებელი დოკუმენტები, ელექტრონული ლოგები და წარუდგინოს **ადმინისტრატორს** მოთხოვნის შემთხვევაში. **ადმინისტრატორი** უფლებამოსილია გააკეთოს ასეთი დოკუმენტების ასლები.

- 12.3 **რეგისტრატორი** ვალდებულია წინამდებარე 12.1 და 12.2 მუხლებში მითითებული დოკუმენტები შეინახოს უსაფრთხოდ და დაიცვას შემთხვევითი დაზიანების/განადგურებისგან.
- 12.4 **რეგისტრატორი** ვალდებულია შეინახოს წინამდებარე 12.1 და 12.2 მუხლებში მითითებული დოკუმენტები **ხელშეკრულების** მოქმედების ვადის განმავლობაში და **ხელშეკრულების** ვადის გასვლიდან 3 (სამი) წლის განმავლობაში გარდა იმ შემთხვევისა თუ **ხელშეკრულების** ვადის გასვლის შემდეგ **რეგისტრატორმა** დოკუმენტები გადასცა **ადმინისტრატორს**, ასევე გარდა **დომენის რეგულაციით** გათვალისწინებული შემთხვევისა.
- 12.5 **ადმინისტრატორის** მოთხოვნის შემთხვევაში **რეგისტრატორი** ვალდებულია წერილობითი ფორმით გადასცეს **ადმინისტრატორს** ინფორმაცია და დოკუმენტაცია, რომელიც საჭიროა **რეგისტრატორის** მიერ **ხელშეკრულების** პირობების შესრულებაზე კონტროლისათვის **ადმინისტრატორის** მხრიდან.
- 12.6 **ადმინისტრატორი** უფლებამოსილია აკონტროლოს **რეგისტრატორის** მიერ **ხელშეკრულების** პირობების შესრულება, მათ შორის, **ტექნიკური პირობების** შესრულება, სამუშაო დროს იმ ადგილის შემოწმებით, სადაც **რეგისტრატორი** ასრულებს წინამდებარე **ხელშეკრულებას**, **რეგისტრატორისთვის** წინასწარი ელექტრონული ფორმით გაგზავნილი შეტყობინების საფუძველზე.

13. პერსონალურ მონაცემთა დამუშავება

- 13.1 **რეგისტრატორი** ვალდებულია დაამუშაოს **რეგისტრანტის** პერსონალური მონაცემები მის ბაზაზე (ა) **რეგისტრანტის** თანხმობის საფუძველზე, (ბ) მარეგულირებელი კანონმდებლობის, მათ შორის საქართველოს კანონმდებლობის და (გ) იმ პირობების შესაბამისად, როგორც ეს მოცემულია **ხელშეკრულების** N4 დანართში. **რეგისტრატორი** ვალდებულია **რეგისტრანტთან** გასაფორმებელ სარეგისტრაციო მომსახურების გაწევის ხელშეკრულებაში მიუთითოს **რეგისტრანტის** თანხმობის შესახებ ასეთი **რეგისტრანტის** პერსონალური მონაცემების **ადმინისტრატორისათვის** გადაცემაზე.

14. ადმინისტრატორის მიერ რეგისტრანტების ინფორმირება

- 14.1 **რეგისტრატორი** ვალდებულია გადაუგზავნოს **რეგისტრანტს** ან/და **რეგისტრანტის** ადმინისტრაციულ საკონტაქტო პირს ადმინისტრატორისგან მიღებული ის ინფორმაცია, რომელიც განსაზღვრულია **რეგისტრანტისთვის**.

15. რეგისტრატორის მიერ მოვალეობის შესრულების პროფესიული წესები

- 15.1 რეგისტრატორის სახელზე რეგისტრირებული დომენური სახელების რაოდენობა არ უნდა აღემატებოდეს რეგისტრატორის პორტფელში შემავალი დომენური სახელების რაოდენობის 10%-ს (ათი პროცენტი).
- 15.2 რეგისტრატორმა არ უნდა გადატვირთოს სახელის სერვერი ან შეაფერხოს (მაგალითად დააორგანიზოს მომსახურების ხელმიუწვდომლობის გამომწვევი კიბერ თავდასხმა [DoS]) ან განახორციელოს სხვა ქმედება, რომელიც სახელის სერვერის სისტემის სრულყოფილ და სტაბილურ მუშაობას შეუქმნის საფრთხეს.
- 15.3 რეგისტრატორი ვალდებულია კეთილსინდისიერად იმოქმედოს ადმინისტრატორთან მიმართებაში და შეასრულოს მასზე დაკისრებული მოვალეობები. რეგისტრატორმა არ უნდა გამოიყენოს არაკეთილსინდისიერად ადმინისტრატორის სისტემა და პროგრამული უზრუნველყოფა.
- 15.4 რეგისტრატორი უფლებამოსილია ჰყავდეს ქვეკონტრაქტორები, რომლებიც უფლებამოსილნი იქნებიან რეგისტრატორის სახელითა და ნაცვლად მიიღონ რეგისტრანტებისგან განაცხადები სარეგისტრაციო მომსახურების გაწევასთან დაკავშირებით და შეასრულონ რეგისტრატორზე დაკისრებული სხვა მოვალეობები. რეგისტრატორი ადმინისტრატორისა და რეგისტრანტების წინაშე ერთპიროვნულად აგებს პასუხს ქვეკონტრაქტორების მიერ განხორციელებულ ქმედებებზე დომენურ სახელთან დაკავშირებით.
- 15.5 ადმინისტრატორის სისტემაში რაიმე ხარვეზის ან შეუსაბამობის აღმოჩენის შემთხვევაში რეგისტრატორი პირველ რიგში ვალდებულია დაუყოვნებლივ აცნობოს ამის შესახებ ადმინისტრატორს. რეგისტრატორმა არ უნდა აცნობოს მესამე პირებს ან არ უნდა გახადოს საჯარო აღნიშნული ინფორმაცია ადმინისტრატორისგან შესაბამისი წინასწარი თანხმობის მოპოვების გარეშე, თუ აღნიშნული გამოიწვევს ადმინისტრატორის ან სხვა მესამე პირების ინტერესების დაზიანებას.

16. ფინანსური პირობები

- 16.1 წინამდებარე ხელშეკრულების საფუძველზე რეგისტრატორის მიერ ადმინისტრატორისთვის გადასახდელი თანხა და გადახდის პირობები მოცემულია ხელშეკრულების N3 დანართში. რეგისტრატორი გაეცნო და ეთანხმება ხელშეკრულების N3 დანართს.
- 16.2 ადმინისტრატორი უფლებამოსილია შეცვალოს N3 დანართში მოცემული პირობები დომენის რეგულაციის შესაბამისად.

17. ზიანის ანაზღაურება

- 17.1 რეგისტრატორი და ადმინისტრატორი ვალდებული არიან აუნაზღაურონ ერთმანეთს ნებისმიერი პირდაპირი ზიანი, რომელიც გამომდინარეობს ხელშეკრულების დარღვევისგან და რომელიც გამოწვეულია მხარის, ხოლო

რეგისტრატორის შემთხვევაში ასევე რეგისტრატორის ქვეკონტრაქტორების განზრახვით ან უხეში გაუფრთხილებლობით.

18. სანქციები

18.1 გაფრთხილება და ჯარიმები

- 18.1.1 რეგისტრატორის მიერ წინამდებარე ხელშეკრულების ან/და დომენის რეგულაციის პირობების შეუსრულებლობის შემთხვევაში ადმინისტრატორმა რეგისტრატორს ელექტრონული ფოსტის მეშვეობით უნდა გაუგზავნოს გაფრთხილება დარღვევის აღმოფხვრის შესახებ, რომელიც შეიცავს წინამდებარე 18.1.2 მუხლში მითითებულ ინფორმაციას.
- 18.1.2 რეგისტრატორისთვის გასაგზავნ შეტყობინებაში ადმინისტრატორმა უნდა მიუთითოს იმ ვალდებულებებზე, რომელსაც არღვევს რეგისტრატორი და მიუთითოს ვადა დარღვევის აღმოსაფხვრელად. ასეთი ვადა არ უნდა იყოს 1 (ერთი) სამუშაო დღეზე ნაკლები.
- 18.1.3 რეგისტრატორის მიერ წინამდებარე ხელშეკრულების ან/და დომენის რეგულაციით გათვალისწინებული ერთგვაროვანი ვალდებულების/ვალდებულებების ერთი კალენდარული წლის განმავლობაში განმეორებით დარღვევის შემთხვევაში ადმინისტრატორი უფლებამოსილია მოსთხოვოს რეგისტრატორს ფულადი ჯარიმის გადახდა. ფულადი ჯარიმის ოდენობა შეადგენს რეგისტრატორისთვის ამ ხელშეკრულების ფარგლებში გასულ საანგარიშო თვეში გამოწერილ ანგარიშ-ფაქტურაში მითითებული საფასურის 20%-ს (ოცი პროცენტი), მაგრამ არანაკლებ 500 (ხუთასი) ლარს ასეთი განმეორებით ჩადენილი დარღვევის თითოეული ფაქტისთვის.
- 18.1.4 იმ შემთხვევაში, თუ რეგისტრატორი არ აღმოფხვრის დარღვევის ფაქტს შეტყობინებაში მითითებულ ვადაში და არ გადაიხდის ჯარიმას (ასეთის არსებობის შემთხვევაში) 10 (ათი) კალენდარული დღის ვადაში ადმინისტრატორი უფლებამოსილია დარღვევის აღმოფხვრამდე და ჯარიმის სრულად გადახდამდე (ასეთის არსებობის შემთხვევაში) შეუჩეროს რეგისტრატორს წინამდებარე ხელშეკრულებით მინიჭებული უფლებამოსილების განხორციელება: ახალი დომენური სახელების რეგისტრაცია, რეგისტრაციის განახლება, დომენური სახელის რეგისტრატორის ცვლილების შედეგად დომენური სახელის რეგისტრატორობის უფლების მოპოვება (შემდგომში „რეგისტრატორის უფლებამოსილების შეჩერება“).

19. ხელშეკრულების ძალაში შესვლა და მოქმედების ვადა

- 19.1 წინამდებარე ხელშეკრულება ძალაში შედის მხარეთა მიერ მისი ხელმოწერის თარიღიდან („ძალაში შესვლის თარიღი“) და მოქმედებს 1 (ერთი) წლის ვადით.

თუ ხელშეკრულების ვადის გასვლამდე 1 (ერთი) თვით ადრე რომელიმე მხარემ მეორე მხარეს არ შეატყობინა ხელშეკრულების შეწყვეტის შესახებ, ხელშეკრულების მოქმედება გრძელდება იმავე ვადითა და პირობებით; აღნიშნული პირობა ვრცელდება ყოველ მომდევნო პერიოდზე.

20. ხელშეკრულების ვადაზე ადრე შეწყვეტა

- 20.1 ადმინისტრატორი უფლებამოსილია ცალმხრივად ვადაზე ადრე შეწყვიტოს წინამდებარე ხელშეკრულება შემდეგ შემთხვევებში:
 - 20.1.1 რეგისტრატორისთვის ხელშეკრულების შეწყვეტის შესახებ წინასწარ, 1 (ერთი) კალენდარული თვით ადრე შეტყობინების გაგზავნით იმ შემთხვევაში თუ ხელშეკრულების 18.1.4 მუხლის შესაბამისად ადმინისტრატორმა შეუჩერა რეგისტრატორს უფლებამოსილება, ხოლო რეგისტრატორმა არ აღმოფხვრა ხელშეკრულების დარღვევა რეგისტრატორის უფლებამოსილების შეჩერებიდან 1 (ერთი) თვის განმავლობაში;
 - 20.1.2 დაუყოვნებლივ რეგისტრატორის მიერ ხელშეკრულების უხეში დარღვევის შემთხვევაში. მხარეები თანხმდებიან რომ წინამდებარე მუხლის მიზნებისთვის უხეში დარღვევა გულისხმობს რეგისტრატორის მიერ ხელშეკრულების 15.2 მუხლის დარღვევას;
 - 20.1.3 ხელშეკრულების N3 დანართის მე-7 პუნქტით გათვალისწინებულ შემთხვევაში;
 - 20.1.4 დომენის რეგულაციის 7.3.3; 7.3.4 და 7.3.5 პუნქტებით განსაზღვრულ შემთხვევაში;
 - 20.1.5 მხარეები ასევე უფლებამოსილნი არიან შეწყვიტონ ხელშეკრულება ურთიერთშეთანხმების გზით ან საქართველოს კანონმდებლობით გათვალისწინებულ სხვა შემთხვევებში.

21. მარეგულირებელი კანონმდებლობა და დავების გადაწყვეტა

- 21.1 ნებისმიერი სახის დავა მხარეებს შორის, უნდა გადაწყდეს მოლაპარაკების გზით. მხარეთა შორის შეთანხმების მიუღწევლობის შემთხვევაში დავას განიხილავს საქართველოს სასამართლო საქართველოს კანონმდებლობის შესაბამისად.
- 21.2 ადმინისტრატორს და რეგისტრატორს შორის ურთიერთობებზე და ხელშეკრულებაზე ვრცელდება საქართველოს კანონმდებლობა.

22. კონფიდენციალურობა

- 22.1 მხარეები ვალდებული არიან არ გაამჟღავნონ ხელშეკრულების მოქმედების დროს მიღებული კონფიდენციალური ინფორმაცია ხელშეკრულების

მოქმედების და მოქმედების ვადის გასვლის შემდეგ 5 (ხუთი) წლის განმავლობაში.

22.2 **ხელშეკრულების** მიზნებისათვის კონფიდენციალური ინფორმაცია მოიცავს ნებისმიერი სახის ინფორმაციას, რომელიც გადაეცა / გადაეცემა ერთ მხარეს ნებისმიერი ფორმით მეორე მხარისაგან ან/და მისი ნებისმიერი თანამშრომლისაგან ან/და კონტრაქტორი პირისაგან ან/და ასეთი კონტრაქტორი პირის ნებისმიერი თანამშრომლისაგან, ნებისმიერი საფუძვლითა და მოტივით, აგრეთვე, ნებისმიერი ინფორმაცია, რომელსაც მხარე მოიპოვებს (ან რომელიც უკვე მოპოვებული აქვს) ამ მუხლში აღნიშნული პირებისაგან ზეპირი თუ წერილობითი ფორმით.

23. დასკვნითი დებულებები

- 23.1 **ხელშეკრულებიდან** გამომდინარე მხარეთა უფლება-მოვალეობების მესამე მხარისთვის გადაცემა მეორე მხარის წინასწარი წერილობითი თანხმობის გარეშე დაუშვებელია.
- 23.2 მხარეები ადასტურებენ, რომ **ხელშეკრულების** დებულებები და მათგან გამომდინარე მხარეთა უფლებები და ვალდებულებები სრულად ვრცელდება მათ სამართალმემკვიდრეებზე ან/და უფლებამონაცვლეებზე.
- 23.3 **ხელშეკრულება** შეიცავს მხარეთა შეთანხმების საბოლოო და სრულ პირობებს და ცვლის მხარეთა ყველა წინა მიმოწერას და წინასწარ მოლაპარაკებებს ამ საგნის შესახებ.
- 23.4 წინამდებარე **ხელშეკრულების** ყველა დანართი წარმოადგენს **ხელშეკრულების** განუყოფელ ნაწილს.
- 23.5 **ხელშეკრულება** შედგენილია ქართულ ენაზე ორი თანაბარი იურიდიული ძალის მქონე ეგზემპლარად.

24. მხარეთა საბანკო რეკვიზიტები

ადმინისტრატორი:

მიმღების ბანკი	სს „თიბისი ბანკი“
ბანკის კოდი	TBCBGE22
მიმღების ანგარიში:	GE21TB1189136020100008
მიმღების სახელი	შპს „კავკასუს ონლაინ“
ს/კ	211380833

რეგისტრატორი: [-]

25. დანართები

ქვემოთ ჩამოთვლილი დოკუმენტები წარმოადგენენ ხელშეკრულების განუყოფელ ნაწილს:

N1 დანართი: რეგისტრატორისთვის დადგენილი მოთხოვნები;

N2 დანართი: ტექნიკური პირობები;

N3 დანართი: ტარიფები და გადახდის პირობები;

N4 დანართი: პერსონალურ მონაცემთა დამუშავების წესები;

N5 დანართი: .GE დომენის რეგისტრაციისა და ადმინისტრაციის წესები (მასში შეტანილი ცვლილებებით და დამატებებით) ხელმისაწვდომია შემდეგ ბმულზე:

https://nic.ge/cdn/f/11/07/uCWzqI6mNkKqkZ7Iaprokw/Domain_Regulation_Amendments_GEO_2019_02_15.pdf;

N6 დანართი: დამატებითი შეთანხმება ორ სიმბოლოიანი ტიპის დომენური სახელების რეგისტრატორის მიერ საკუთარ სახელზე რეგისტრაციის შესახებ.

26. მხარეთა ხელმოწერები

რეგისტრატორის სახელით

ადმინისტრატორის სახელით
